

RISIBÍ PA DUNA

"Un dia Señor a bisa Abram: 'Bandoná bo tera, bo famia i bo hendenan i bai e tera ku Mi lo mustra bo. Bo desendientenan lo bira un nashon grandi; lo Mi bendishoná bo [...] i lo bo ta un bendishon pa otronan."

Génesis 12:1, 2

TA BISA KU ORA UN PASHENT bishitá e konsultorio di Dr. Alfred Adler pa motibu di depreshon, e sikiatra renombrá mesora ta hasi e pregunta si bo ke kura. E kontesta semper tabata e meskos.

—Klaro!

I e "resèpt" di Adler tambe ta e meskos:

—Tur dia, durante dos siman hasi algu ku ta brinda felisidat na un otro persona.*

E terapia ku Adler tabata preskribi na su pashèntnan tabatin resultadonan garantisá pasobra nos ta kreá pa ta kanal di bendishon pa *otro persona*. Anto esaki ta eksaktamente loke nos teksto bíbliko di awe ta kòrda nos. "Lo Mi bendishoná bo," Señor a bisa Abram, "i lo bo ta un bendishon pa otronan." Kon Dios a bendishoná e patriarka? Abraham (ku asina el a yama despues ku Dios a kambia su nòmber) a yega di ta tata di un gran nashon; el a gana respèt di su bisiañanan, i e tabata un hòmer "mashá riku; e tabatin oro, plata i hopi bestia" (Gén. 13:2). Pero e patriarka no meser tuma poseshon di e bendishonnan akí egoistamente. E lo risibí *pa duna*. Anto pa medio di e registro bíbliko nos sa ku esaki tabata presisamente loke el a hasi, benefisiá otronan ku su biennan, i spesialmente ora di kompartí e konosementu di Dios unda sea ku e establese su mes.

Ku su ehèmpel, Abraham a demostrá ku "e lei di bida pa universo" ta konsisti den risibí pa duna, manera e sita konosí di *El Deseado de todas las gentes* ta bisa: "No tin niun para ku ta bula den laira, niun animal ku ta move riba tera, ku no ta sirbi algun otro bida. No tin ni sikiera un blachi di mondi, ni un yerba ku no tin utilidat. [...]. Solo ta drama su lus pa alegrá mil mundu. E oséano, origen di tur nos manantial i fuentenan, ta risibí e koriente di tur e teranan, pero e ta risibí pa duna" (kap. 1, p. 12).

Ainda mas importante, ku su ehèmpel e patriarka a glorifiká e nòmber di Dios. Di kon nos sa esei? Pasobra ora nos mira Hesus nos ta mira ku e "*gloria di nos Dios ta konsisti den duna*" (*ibid.*).

Bo ta risibiendo bendishon diariamente? Anto bo ta kompartiendo nan? Kòrda ku e plan di Dios ta konsisti di, no solamente den bendishoná, sino *ku abo ta un bendishon* pa otronan.

Kerido Hesus, meskos ku pa medio di bo intermediashon ta yega na nos bendishonnan selestial diariamente, awe mi tambe ke duna na otronan di e hopi ku mi ta risibí, i asina ta parti tambe di e "sirkuito di benefisensia ku ta representá e karakter di e gran Dunadó, e lei di bida."
(*El Deseado de todas las gentes*, kap. 1, p. 13).

*Sitá den Thomas Lickona, *Character Matters*, Touchstone Books, 2004, p. 278.